



CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E ORDENACIÓN UNIVERSITARIA E A FUNDACIÓN EMPRESA-UNIVERSIDADE GALEGA (FEUGA) PARA IMPULSAR PROGRAMAS DE POSICIONAMIENTO E CAPTACIÓN DE PROXECTOS EUROPEOS PARA O SISTEMA UNIVERSITARIO GALEGO.

Santiago de Compostela, 11 de maio de 2016

COMPARECEN

Dunha parte, D. Román Rodríguez González, conselleiro de Cultura, Educación e Ordenación Universitaria (en diante CONSELLERÍA), nomeado mediante o Decreto 15/2015, do 9 de febreiro (DOG núm. 27, do 10 de febreiro), de acordo co disposto no artigo 34 da Lei 1/1983, do 22 de febreiro, de normas reguladoras da Xunta e da súa Presidencia e no acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares, publicado pola Resolución da Consellería de Economía e Facenda do 8 de abril de 1991 (DOG núm. 82, do 30 de abril).

Doutra, a Fundación Empresa-Universidade Galega (en diante FEUGA), con enderezo social en Santiago de Compostela, na Rúa Lope Gómez de Marzoa, s/nº, CIF G15051667, representada neste acto por D. Francisco Javier Pereiro Pérez, director xeral, con poder abondo para este acto, en virtude de escritura pública nº 963, outorgada o 19 de outubro de 2009, ante a notaria Dona Susana Ortega Fernández, do ilustre Colexio de Galicia, con residencia en Ferrol.

Interveñen en función dos seus respectivos cargos e no exercicio das facultades que teñen conferidas e

EXPOÑEN

PRIMEIRO.- A creación de FEUGA respondeu a unha iniciativa dos máis sobresaíntes axentes públicos e privados da comunidade. Como fundación de interese cultural, está recoñecida pola Orde do 1 de agosto de 1984 (DOG núm. 206, do 26 de outubro) e inscrita no Rexistro de Fundacións da Xunta de Galicia co núm. 155 e que se institúe como fundación de interese universitario no ano 1982, ao amparo do Decreto 2930/72, do 21 de xullo.



FEUGA é unha entidade sen ánimo de lucro e de dereito privado, especializada na transferencia de coñecemento, innovación e tecnoloxía desde o Sistema universitario de Galicia ao mundo empresarial e á sociedade en xeral.

A súa misión é achegar a competencia, a habilidade, a experiencia, o talento e o saber científico e técnico xerado polos grupos de investigación universitarios ao mercado, para favorecer o emprendemento na universidade e o dinamismo no tecido produtivo. FEUGA rendibiliza o traballo do persoal investigador para provocar o salto dos seus coñecementos á aplicación práctica, de xeito visible e compartido.

O Padroado é o órgano de goberno, representación e administración de FEUGA. Os seus membros fundadores son as tres universidades galegas e as máis prestixiosas institucións públicas e empresas privadas de Galicia.

SEGUNDO.- No momento actual é necesario despregar unha rede de intelixencia que detecte e explote as oportunidades de crecemento e mellora para o Sistema universitario de Galicia (en diante SUG) e, como consecuencia, para o conxunto de Galicia. O obxectivo é incrementar a taxa de éxito na consecución de proxectos europeos para grupos ou proxectos institucionais, que agora está nun promedio do 5 %; máis visibilidade e oportunidades no ámbito europeo para o SUG e para os seus grupos de investigación; un incremento nas colaboracións internacionais das universidades galegas, tanto no ámbito académico como no sector industrial; e unha mellora dos resultados de investigación: máis patentes, máis publicacións, máis promoción e divulgación e máis ingresos para o I+D+i de Galicia.

TERCEIRO.- O proceso terá como base a retroalimentación continua de información entre o persoal técnico de FEUGA e os grupos e agrupacións de investigación do SUG. Partirase dunha definición estratéxica das áreas temáticas a priorizar, tendo en conta tamén a Estratexia de especialización intelixente (RIS3 Galega), estruturándoas ao redor de tres bloques temáticos: ‘Energía, Tecnoloxías de Información e Comunicación’, ‘Tecnoloxías de Fabricación, Procesos Industriais, Nanotecnoloxía e Materiais’; e ‘Medioambiente, Biotecnoloxía e Agroalimentación’. A partir destas áreas, deseñaranse actividades de posicionamiento e accións de lobbying e networking, co obxectivo de dar visibilidade aos proxectos galegos nas grandes agrupacións tecnolóxicas europeas, como JTIs (Bio-Based Industries) ou EIPs (European Innovation Partnerships).

CUARTO.- Galicia definiu a súa Estratexia de especialización intelixente para o período 2014-2020 (Estratexia RIS3 Galicia) coa participación de tódolos axentes do Sistema galego de



innovación. Este proceso responde a unha esixencia da Comisión Europea dirixida ás rexións e aos estados membros que desexen optar a fondos estruturais no período 2014-2020, de identificalas áreas de especialización susceptibles de recibir financiamento comunitario para a realización de proxectos de I+D, innovación e TIC.

O dito proceso de análise deu lugar a un inventario de capacidades do que resulta a visión estratéxica e que se estrutura ao redor de 3 retos que orientarán a definición detallada da estratexia de actuación para o período 2014-2020. Cada un dos tres retos ten prioridades asociadas, incluíndo en cada unha destas prioridades liñas de acción específicas aliñadas cos obxectivos propostos, así como unha análise da coherencia destes retos e prioridades coas políticas de temática relacionadas e os principais programas de innovación a nivel rexional, nacional e europeo, como é o caso das respectivas axendas dixitais ou o Programa horizonte 2020, entre outros.

QUINTO.- Que a Secretaría Xeral de Universidades, de acordo coas competencias que lle outorgou o Decreto 4/2013, do 10 de xaneiro, de estrutura orgánica da CONSELLERÍA, debe velar pola promoción e xestión eficiente e integrada dos recursos e capacidades de investigación do SUG para a súa vertebración e posta en valor no marco do Sistema de innovación. Entre estas competencias está a promoción da coordinación das universidades galegas no establecemento de programas, infraestruturas e actuacións en materia de investigación.

SEXTO.- Que o Plan galego de investigación, innovación e crecemento asume no eixo estratéxico 3 (Sistema integral de apoio á investigación) que para garantir a produción dunha investigación de calidade e excelencia por parte do sistema de I+D+i é esencial contar coa estrutura e prácticas xestoras eficaces, de maneira que se cre unha contorna favorable á investigación, cun sistema integral que garanta a eficiencia operativa.

Por conseguinte, as partes abaixo asinantes acordan subscribir o presente convenio, que se rexerá polas seguintes

CLÁUSULAS

PRIMEIRA.- Obxecto do convenio e finalidade

O obxecto deste convenio é establecer as condicións polas que se rexerá a colaboración da CONSELLERÍA para o financiamento dunhas accións da FEUGA para impulsar un programa de posicionamento e captación de proxectos europeos para o SUG.



A axuda irá destinada a subvencionar o gasto realizado pola FEUGA (presenza permanente en Bruxelas, custos de persoal, viaxes e outros, cotas de agrupacións) para:

1. Aumentar o posicionamento internacional do SUG nos proxectos financiados dentro do marco dos programas europeos de financiamento de I+D+i. A metodoloxía estará composta por dúas áreas fundamentais:

a) Traballo con grupos de investigación do SUG, combinando información “cara ao persoal investigador” (topic, financiamento, impactos, ...), información “dende o/a investigador/a” (carteira tecnolóxica, ...) e realizando unha labor de encaixe de ideas en topics, como de experiencia en ideas e consorcios alleos.

b) Actividades de posicionamento, realizándose en diferentes ámbitos de actuación:

► Eventos:

- Eventos transversais, destinados a aumentar as capacidades xerais na preparación de proxectos.
- Eventos tecnolóxicos, nos cales perfilaranse futuras iniciativas e programas de traballo en diferentes sectores.
- Eventos de brokerage, para debater e expoñer ideas e iniciativas relacionadas con futuros proxectos.

► Agrupacións tecnolóxicas. Realizaranse actividades destinadas á participación na definición de futuros programas de traballo, á sistematización das liñas de traballo das universidades para presentalas nas agrupacións tecnolóxicas e ás accións de lobbying e networking.

► Entidades rexionais. Coa Axencia Galega de Innovación (GAIN), os Centros Tecnolóxicos de Galicia e cos clúster e empresas galegas, desenvolveranse actividades destinadas a unha boa coordinación rexional, en liña coa Estratexia de especialización intelixente (RIS3).

► Entidades nacionais e europeas. Para desenvolver actividades de relación cos principais actores a nivel nacional e europeo (Centro de Desenvolvemento Tecnolóxico e Industrial, grupos parlamentarios, Comisión Europea, ...).

2. Aumentar a captación de fondos derivados de proxectos europeos
3. Incrementar as colaboracións internacionais das universidades galegas, así como as colaboracións co sector industrial e os resultados de investigación (publicacións, patentes, ...).
4. Promoción e divulgación de proxectos e convocatorias europeas.



SEGUNDA.- Contía da axuda

A dotación da CONSELLERÍA para este convenio é de seiscientos dous mil douscentos un euros (602.201,00 €) distribuído en dúas anualidades con cargo ao Plan galego de financiamento universitario 2016-2020 (aprobado polo Acordo do Consello da Xunta de Galicia do 29 de outubro de 2015, DOG número 221, do 19 de novembro), aplicación orzamentaria 10.40..561B.781.0 (2016 00366) e co seguinte reparto:

	2016	2017	TOTAL
FEUGA	248.826,00 €	353.375,00 €	602.201,00 €

Esta cantidade de 602.201,00 € trátase dun importe certo, e queda por conta da FEUGA a diferenza de financiamento necesario para a total execución da actividade subvencionada, debendo ser reintegrado o financiamento público no caso e polo importe que supere o custo total e real da actividade, segundo o establecido no artigo 21.2 do regulamento da Lei 9/2007, do 13 de xullo, de subvencións de Galicia, aprobado polo Decreto 11/2009, do 8 de xaneiro.

A axuda é compatible con outras concedidas para o mesmo fin, pero en ningún caso, o importe da subvención achegada pola CONSELLERÍA poderá ser de tal contía que, illada ou en concorrencia con outras subvencións, supere o custo da actividade subvencionada, tal como se establece no Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia.

De acordo co disposto na comunicación da comisión sobre o Marco de axudas estatais de investigación e desenvolvemento e innovación (2014/C 198/01), publicado no Diario Oficial da Unión Europea do 27 de xuño de 2014, a subvención prevista neste convenio non constitúe axuda de Estado nos termos do artigo 107 do Tratado de funcionamento da Unión Europea ao tratarse de financiamento público de actividades non económicas como instrumento axeitado para dar resposta ao obxectivo do interese común. Así, a FEUGA é unha fundación sen ánimo de lucro que ten entre os seus fins a difusión da investigación e o coñecemento, co obxectivo de estimular a actividade innovadora mediante a contribución á transferencia de coñecementos, a difusión da información e a colaboración entre as empresas e as organizacións de investigación, prestando servizos de asesoramento/apoio en materia de innovación.



Non obstante a FEUGA deberá garantir que as actividades derivadas deste convenio axústanse ás normas procedimentais e materiais vixentes no momento da concesión da axuda, e debe informar á CONSELLERÍA por medio da comisión de seguimento.

TERCEIRA.- Obrigas

A CONSELLERÍA comprométese a colaborar no financiamento do gasto realizado pola FEUGA para impulsar os programas de posicionamento, a captación de proxectos europeos e a transferencia de información no SUG.

A FEUGA comprométese a que das actuacións previstas neste convenio para promover a participación en proxectos de investigación nacionais e internacionais se beneficien as tres universidades do SUG e a facer constar en calquera tipo de publicidade e información que realice ao respecto a participación e a colaboración da Consellería de Cultura, Educación e Ordenación Universitaria.

De conformidade co artigo 31.7 da Lei 9/2007, do 13 de xuño, de subvencións de Galicia, non poderá realizarse o pagamento da subvención en tanto a FEUGA non se atope ao corrente no cumprimento das súas obrigas tributarias e fronte á Seguridade Social e non teña pendente de pagamento ningunha outra débeda coa Administración pública da comunidade Autónoma ou sexa debedor por resolución de procedencia de reintegro

CUARTA.- Fórmula de pagamento

Con periodicidade anual a CONSELLERÍA realizará o pagamento contra a presentación (antes do 30 de novembro) por parte da FEUGA dunha memoria anual na que se dea conta do destino da achega e dunha declaración na que conste o cumprimento da finalidade do presente convenio e na que se recolla que os fondos foron destinados ao obxecto do convenio, así como o detalle da realización dos gastos e dos pagamentos. Os ditos gastos acreditaranse mediante a presentación das correspondentes facturas e demais documentos de valor probatorio equivalente, achegándose tamén os comprobantes dos pagamentos efectuados.

Na memoria da segunda anualidade incluírase, como mínimo, os seguintes indicadores:

- Número de proxectos aprobados con participación ou liderados polas universidades.
- Número de grupos participantes en propostas presentadas ou en proxectos presentados.
- Ingresos captados polas universidades en proxectos aprobados.
- Ingreso medio por proxecto e grupo das universidades.
- Índice de éxito das propostas presentadas/aprobadas.

Así mesmo, deberá acreditarse que FEUGA está ao día no cumprimento das obrigas tributarias ou fronte á seguridade social e de non ter débedas coas administracións. Tamén se aportará unha



declaración complementaria do conxunto das axudas solicitadas, tanto as aprobadas ou concedidas como as pendentes de resolución, para este fin, das distintas administracións públicas.

QUINTA.- Vixencia do convenio

O presente convenio entrará en vigor na data da súa sinatura, sen prexuízo de que poidan atender accións realizadas desde o 1 de xaneiro de 2016 e terá vixencia ata o 31 de decembro de 2017.

Non obstante ao establecido no apartado anterior, este convenio poderá extinguirse por acordo mutuo e voluntario das partes, por desistencia dalgunha ou por denuncia deste por incumprimento dalgunha delas, o que se comunicará fidedignamente, logo de audiencia desta e con, polo menos, un mes de antelación. En calquera destes casos procederase á revogación da axuda, así como ao reintegro total ou parcial das cantidades percibidas e a esixencia de xuros de mora nos casos previstos no artigo 33 da Lei 9/2007, do 13 de xuño, de subvencións de Galicia.

SEXTA.- Responsabilidade

A subscrición do presente convenio non supón relación laboral contractual ou de calquera outro tipo entre os/as profesionais que vaian desenvolver as actividades e a CONSELLERÍA, de tal xeito que non se lle pode esixir responsabilidade ningunha, indirecta nin subsidiaria, polos actos ou feitos acontecidos no seu desenvolvemento.

SÉTIMA.- Comisión de seguimento

Para o seguimento do convenio ou coñecemento de calquera cuestión sobre a súa interpretación, modificación, resolución ou efectos deste que poidan xurdir, créase unha comisión mixta constituída do seguinte modo:

- Tres membros da Secretaría Xeral de Universidades, dos que un/unha actuará como presidente/a.
- Tres membros da FEUGA.

A dita comisión actuará como órgano de vixilancia, seguimento e control do establecido neste convenio, promovendo, se o considera conveniente, outras actuacións que poidan enriquecer o seu desenvolvemento.

Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida serán resoltas pola CONSELLERÍA.



OITAVA.- Publicidade

Segundo a disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, a FEUGA consente expresamente para que a administración autonómica inclúa e faga públicos, nos rexistros regulados neste decreto, os datos relevantes referidos ás axudas e subvencións recibidas, así como ás sancións impostas.

A reserva que puidera facer a FEUGA no sentido de non autorizar a obtención dos datos ou a publicidade destes nos rexistros, que en todo caso terá que expresarse, poderá dar lugar á exclusión do proceso de participación para obter a axuda ou á revogación do acto de outorgamento.

A subvención estará sometida á función interventora e de control financeiro exercida pola Intervención Xeral da Comunidade Autónoma, nos termos que establece a Lei 9/2007, do 13 de xuño, de subvencións de Galicia. Así mesmo, estarán sometidas ás actuacións de comprobación e previstas na lexislación do Tribunal de Contas e do Consello de Contas no exercicio das súas funcións de fiscalización e control do destino das subvencións.

En aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno e de acordo co indicado na actual redacción do artigo 20 da Lei 38/2003, de 17 de novembro, xeral de subvencións, a información correspondente ao presente convenio publicárase na Base de Datos Nacional de Subvencións.

NOVENA.- Natureza do convenio

De acordo co establecido no artigo 36 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, este convenio ten un interese público dado que é preciso despregar unha rede de intelixencia que detecte e explote oportunidades de crecemento e mellora para o Sistema universitario de Galicia e dar resposta ás necesidades de transferencia de investigación por medio de accións para promover que as universidades públicas galegas poidan participar en proxectos de investigación europeos e internacionais.

Estas accións esténdense ás tres universidades galegas, podendo beneficiarse todos os grupos de investigación do SUG e, polo tanto, non sendo necesario promover a concorrència competitiva.

O presente convenio de colaboración ten a natureza dos previstos no artigo 4.1c) do Real decreto legislativo 3/2011, do 14 de novembro, polo que se aproba o texto refundido da Lei de contratos do sector público, rexéndose para os seus efectos pola normativa xeral en materia de contratos



XUNTA DE GALICIA

CONSELLERÍA DE CULTURA, EDUCACIÓN
E ORDENACIÓN UNIVERSITARIA
Secretaría Xeral de Universidades



das administracións públicas e polo establecido na Lei 9/2007, do 13 de xuño, de subvencións de Galicia e o seu regulamento, aprobado polo Decreto 11/2009, do 8 de xaneiro.

DÉCIMA.- Resolución de controversias

O presente convenio réxese en canto a súa interpretación e desenvolvemento polo ordenamento xurídico administrativo, con expresa submisión das partes á xurisdición contencioso-administrativa, nos termos que se establecen no artigo 8.3 da Lei 30/1992, do 26 de novembro, de réxime xurídico das administracións públicas e do procedemento administrativo común.

Lido por todas as partes, por si mesmas, e como proba de conformidade co expresado no presente convenio, asínano e rubrícano por triplicado, no mesmo lugar e data que se indica ao comezo.

O conselleiro de Cultura, Educación e
Ordenación Universitaria

O director xeral de FEUGA

Román Rodríguez González

Francisco Javier Pereiro Pérez